

Investigacion ta muestra cu cifra di embarazo hubenil ta bahando

ORANJESTAD-- Famia Planea a conduci un investigacion entre februari 2013 pa juni 2013 unda cu a genera informacion valioso pa nan maneho ariba e hobennan. Banda di e investigacion aki, tambe a analisa e fenomeno di embarazo hubenil na Aruba. Pa asina a compara e Embaraso Hubenil di un pais cu e otro, a haci uzo asina yama 'Age Specific Fertility Rate' (ASFR). Esaki ta e manera cu por duna un bista obhectivo di e situacion. United Nations (U.N.) a compara e cifra di embarazo (segun e

ASFR) di tur pais na mundo. Pa por a haci esaki a pidi tur pais pa entrega nan informacion di mas recien entre e aña di 2000 pa 2009. Tin pais a logra entrega esun di mas recien (2009), otro a logra entrega uno mas bieu (2000, 2001 of 2002) y tin pais no a logra brinda United Nations cu e informacion aki. E documento aki a analisa cu e cifra di embarazo hubenil na paisnan den Latino America y tambe Africa ta mas halto na mundo. Argentina su ASFR ta 67.7 entre e hobennan di 15 pa 19 aña. Chile su cifra

ta 54.9, di Surinam ta 65.5 y di Venezuela ta 101.8. Den paisnan na Europeo y Asiatico e cifranan aki ta mas abou. Por ehempel un pais manera Hulanda su ASFR ta 5.3, Alemania ta 9.8, Spaña ta 12.2, Pakistan ta 20.3, Mongolia ta 19.3 y Israel ta 13.4. .

Si compara Aruba cu Hulanda a base di e documento di U.N., por nota cu Aruba su Embaraso Hubenil ta hopi precario. Hulanda su cifra ta 5.4 (0.54%) y di Aruba ta 42.87 (4.287%). E cifra di Aruba ta di aña 2009. Si compara e embarazo Hubenil di Aruba cu un pais den Latino America, Aruba su situacion lo no muestra malo. Un pais manera Venezuela su ASFR ta rond di 100. E documento por a saca afo cu Aruba su cifra di embarazo hubenil (a base di e ASFR) ta mas o menos e di 9 pais den Caribe cu e embarazo hubenil mas halto. Mester añadi atrobe cu no ta tur pais a duna nan informacion y alabes tin isla, manera Jamaica, no a ni duna esaki. Aruba su embarazo hubenil ta



halto, ta un hecho si compara esaki cu paisnan di nos region (manera Europa y Asia). Manera a wordo bisa, henter e region aki tin cifra halto di embarazo hubenil. Esey ta indica cu e forma con nos ta anda cu e topico (nos cultura den e region aki) tin un influencia ariba e resultado. Nos tin un factornan cu ta hunga un rol, manera aspectonan socioeconomico. Nos por compara nos mes cu otro pais, cu e desaroyo entre e ultimo añanan. Aruba su ASFR na aña 2000 tabata 52.04 entre

e edad di 15 pa 19 aña. Na 2005 esaki tabata 41.73 y na 2010 esaki tabata 42.37. Durante e ultimo 13 añanan e ASFR a subi y baha na diferente ocasion. Loke ta notabel ta cu desde 2007 e futuro a cuminsa bira mas positivo y na 2010 e resultado a keda baha te cu na 2012, pa prome biaha den 13 aña, e ASFR a baha te na 35.98 (3.598%) p'e edad di 15 pa 19 aña. Esaki ta algo positivo, mirando cu aunke cu nos ASFR ta halto, e desaroyo mas positivo ta uno notabel. □

